



**Kamis, 2 September 2021**  
**Ogen: Ezekiel 12: 21-28**



**Lantai Bo Ipelawen-lawen**



**N**ina Tuhan: "Paksana nggo seh, janah jadi me bagi si inubuatken!" Adina i bas ayat 17-20 Dibata merawa kerna hubungan sapih manusia i bas bangsa Israel lanai lit kekelengen, tapi i bas bagin enda, Dibata merawa ban nabi-nabi palsu asum si e ernubuat si la payo. Enggo mentas kerina paksa-paksa, tapi nubuat kerina sia-sia (ay. 22). Kepe enggo kerina ngidahsa labo jadi nubuat-nubuat e kerina, bual kerina. Nabi-nabi palsu e ndarami kinihaganna ngenca bagepe keuntungan man dirina ngenca. Ipeseh Dibata man nabi Esekiel maka Dibata masapken kerina pengenehenen si rusur erbanca kalak jadi papak. Em sabapna merawa kal Dibata janah nina maka lanai ipedekah-dekahna guna ngukum bangsa e.

Proses kegeluhen manusia tuhu-tuhu pedas, ras praktis. Si rusur erbanca biak saber enggo urak i bas manusia zaman genduari enda. Sabap kai pe ateta pedas min seh, kai pe ateta minter min jadi bagi ukurta. Tapi adi bagi konteks enda, ukumen nge si bakal jadi, uga dage ninta? Tentu sada kengerin nge si bakal jadi e. Situhuna labo min ateta jadi si bage i bas kegeluhenta. Adi pasu-pasu min ndai, lanai bo ipelawen-lawen, meriah nge si akap! Emaka, adina Dibata ngerana lanai bo ipelawen-lawen guna ngukum Bangsa Israel. Enda jadi sada pengajaren man banta guna kita jera dengen robah i bas kegeluhenta ndalanken perbahanen si la ngena ate Dibata.

Lit kap istilah: *we fall. We fail. We break. But then, we rise. We heal. We overcome.* Si ertina: Kita ndabuh, gagal, hancur. Tapi dungna, kita keke ras menang. Ngasup ngalaken kerinana. Si iarapken maka kesalahen si ibahan kita la ndekah, la seh mpeturah rawa Dibata. Dibatanta e e me Dibata si erkeleng ate man kalak si tek dengen erkemalangen man bana.